

---

---

# DIE APOSTOLIESE GELOOFSBELYDENIS [19]

No. E284

---

---

## ARTIKEL 7

*waarvandaan Hy sal kom om die lewendes  
en die dooies te oordeel.*

**H**ieroor is God se Woord baie duidelik: ook diegene wat in Christus sterf, sal die eindoordel moet deurgaen. En hulle sal aan presies dieselfde norme gemeet word as die ongelowiges. "God trek immers niemand voor nie" (Rm 2:11). Hy het nie witbroodjies nie. Hy meet nie met dubbele standaarde nie.

In 'n sin is die Christelike lewe hier en nou niks anders nie as die Here God se gereedmaking van Sy kinders vir daardie dag van afrekening. Hy werk nou heiligmakend só in die uitverkorenes dat nie 'n enkele een van hulle op daardie dag verleë sal staan nie. Selfs diegene wat verwerp word - sêlfs die duiwel - sal op daardie dag geen fout kan vind met die feit dat miljoene ewige loon ontvang nie. God se vyande sal moet toegee: elkeen - gered en ongered - ontvang presies in ooreenstemming met die lewe wat hy of sy in hierdie lewe gely het.

Laat ons nooit die volle evangelie vergeet nie:

*Ja, ons word gered uit genade alleen, op grond van Christus se verdienste alleen, en deur geloof alleen. En oor hierdie mees fundamentele kant van ons verlossing sal ons nooit kan ophou juig nie. Maar ons mag nie hier stop nie. Ons word eweneens gered tót heiligheid, goeie werke en gehoorsaamheid - en daarom uiteindelik ook vólgens die lewe van geregtigheid waartoe die Heilige Gees ons in staat gestel*

*het, nadat Hy ons geroep en wederbaar het vanuit 'n God-vermydende hartsgesteldheid en 'n selfgesentreerde lewe.*

## Die eindoordel het twee komponente

- Eerstens praat die Skrif oor die skeiding van diegene wat gered is en diegene wat nie gered is nie - soos byvoorbeeld in Mt 25:31-46, waar die skape en bokke van mekaar geskei word op grond van die skape se goeie werke en die afwesigheid daarvan in die bokke se lewens. Duidelik sal die lewens wat mense hier en nou leef 'n belangrike rol speel wanneer uitspraak eendag gelewer word oor hulle ewige bestemming (vgl. Mt 25:31-46; Mt 5:20; Rm 2:6-11 *et al*).

Hierdie onmiskenbare Skrifbeklemtoning volg vanuit die onverbreekbare geïntegreerdheid van God se verlossingswerk in Sy uitverkorenes se lewens. Onder meer beteken dit dat heiligmaking en dus gehoorsaamheid altyd, sonder uitsondering, volg na geloof en reverdiging. Dis waarom Jakobus skryf: "Sien julle dan nou dat die mens geregverdig word uit die werke en nie alleen uit die geloof nie." Dis waarom hy sê dat die geloof sonder die werke dood is (Jk 2:14-26).

Té maklik vergeet ons een van die wekrope van die sestende eeuse Reformasie: *Sola fides justificat, sed non fides sola est* (Alleen geloof regverdig, maar nie geloof wat alleen is nie).

Die wêreldwyd-geagte skrywer van die negentiende eeu, J.C. Ryle, het dit aangrypend gestel.

*"Evidence, evidence, evidence, will be the one thing wanted when the great white throne is set ... I can find no evidence that will be admitted in that day, except sanctification."*

- Tweedens praat die Skrif van 'n beoordeling van *gelowiges* - hulle wat inderdaad gered is - se

lewens met die oog op ewige loon<sup>1</sup>. Uitdruklik verklaar 1Kor 3:15 dat die werk wat jy vir die Here doen, maar nie reg doen nie, verbrand sal word - maar dat jy self tog, ten spyte daarvan, gered sal word (mits, natuurlik, jy deur 'n ware geloof met Christus verenig is).

## Aangeneem of verwerp (2 Kor 5:10)

Hierdie vers sny baie van die beginsels aan wat ter sprake is as ons 'n Bybelse perspektief op die eindoordel wil bekom.

- Die vers (10) begin met "want" (OAV) of "immers" (NAV). Dit verduidelik dus die voorafgaande.

Ook dié vers (9) hou verband met die voorafgaande ("Daarom", OAV).

Waaroor gaan dit in v.1-8? Paulus skryf in dié verse oor die komende dood en die implikasies daarvan (1-8).

- As die apostel sê hy het net een wens (NAV), naamlik om te lewe soos die Here wil, gebruik hy 'n woord wat beteken *om ambisieus te wees*. Dit is dus sy brandende hartstog om in alles wat hy doen die Here te behaag.

- Ons "almaal" moet voor die regterstoel verskyn - selfs Paulus en die ander apostels. Vir een en elkeen sal daar dus 'n dag van afrekening kom.

Ons wat in Christus is, kan en moet ons verheug in die wonder van onomkeerbare regverdiging en die sekere vooruitsig op ons komende heerlikmaking. Maar dit onthef ons nie van die gewigtige verantwoordelikheid om lewenslank en puntenerig in die lig van Christus se komende regterstoel te leef nie.

---

1. Mt 10:42; 25:1-46; Mk 9:41; Lk 14:12-14; 1Kor 3:10-15; Ef 6:8; 2Jh 8.

Sekerlik is dankbaarheid vir die Here se groot verlossingsdade genoegsame rede vir 'n lewe wat dit najaag om Hom te behaag en te verheerlik. Maar daar is nóg 'n rede: *my lewe hier en nou gaan een of ander belangrike rol speel wanneer my loon, al dan nie, in die hiernamaals bepaal word!*

- As die apostel skryf dat ons voor Christus sal "verskyn", gebruik hy 'n sterk woord: *ons sal blootgelê word, gestroop van elke fasade van vroomheid* - om totaal en volledig geopenbaar te word vir wie en wat ons was.

- "Elkeen sal ontvang" volgens wat hy of sy tydens hierdie aardse lewe gedoen het. Eintlik wil die Grieks sê dat 'n mens dit sal *terug ontvang*<sup>2</sup>. Dit sinspeel op onpartydige en regverdige beoordeling. Dit sal in pas wees met die lewens wat ons hier en nou geleef het.

- Voorts bied 'n versigtige lees van die teks nog 'n belangrike perspektief - op twee maniere.

Eerstens, die werkwoord "gedoen" is 'n eenvoudige verlede tyd. Vanaf die regterstoel word dus teruggekyk op iemand se lewe as 'n eenheid, as 'n geheel. Dit gaan oor wat jy tipies gedoen het.

Tweedens, Paulus skryf, letterlik: ons sal die *dinge* (meervoud) terug ontvang wat in die liggaam gedoen is, of *dit* (enkelvoud) goed was of kwaad.

Hierdie oorgang van die meervoud na die enkelvoud is verrassend en sprekend. Wat dit wil tuisbring, is dat, hoewel niks die beoordeling sal ontglip nie (*dinge, meervoud*), sal ons lewens en dade as 'n geheel beskou word (*enkelvoud*).

- Opgesom:

*Geen enkele daad of versuim kan met sekerheid uitwys of iemand genade ontvang*

---

2. Gr. *Komisetai*: Aoristus medium konjunktief van *komizo*.

*het nie. Nee, al die besonderhede van ons lewens gesamentlik, ons tipiese gedrag, wys uit wie ons werklik in ons diepste wese is - of ons inderdaad wedergebore is en 'n nuwe hart ontvang het.*

- My lewe as geheel, nadat ek met Christus verenig is, sal nie net uitwys of ek inderdaad deur die Gees van God herskep is nie, maar dit sal ook my ewige loon bepaal.

As 2Kor 5:10 praat van 'n lewe wat deur "kwaad" gekenmerk word (vgl. ook OAV), verwys die Grieks eintlik na 'n lewe wat *waardeloos* is - en dus nie beloon kan word nie. Dit impliseer duidelik dat 'n lewe wat "goed" is wél *waardevol* is, en daarom beloon sal word.

Dit bevestig die res van die Nuwe Testament se getuïenis dat die regterstoel eendag nie vir God se kinders 'n strafbank sal wees om vonnisse uit te meet vir elke stukkie sonde wat uitgelig sal word nie. Nee, dit sal gerig wees op 'n waardebeoordeling van elkeen se lewe om te sien tot watter mate dit *beloon* kan word.

Die vraag sal dus wees: *Tot watter mate sal my lewe beloon kan word? Tot watter mate het dit iets beteken vir die Here, Sy koninkryk en Sy eer?*

Gelowiges kan en moet dus die eindoordeel op die voorvoet en vol verwagting tegemoet gaan. Maar op hierdie punt moet ons nou na 'n volgende Skrifuitspraak toe beweeg, wat meer lig oor hierdie aangrypende saak bied (1Kor 3:10-15).

### Meer of minder loon (1Kor 3:10-15)

Elke gelowige is besig om te bou op die fondament wat reeds gelê is - op Jesus Christus en Sy werk ter wille van ons (11-12). Ewige redding al dan nie, is dus nie hier ter sprake nie. Want as mens op Christus as fondament bou, is jy immers 'n ware Christen en as sodanig gered.

- Maar elkeen moet "mooi kyk hóé hy ... bou"

(10b). Ons werk gaan immers "aan die lig kom" (13). Dis dieselfde begrip as wat ons in 2Kor 5:10 raakgeloop het: ons werk sal blootgelê word; dit sal gesien word vir presies wat dit was.

Die beeld van bouwerk word gebruik. Hóé ons bou, sal deur vuur getoets word - dus deur en deur. Slegs as ons kwaliteitmateriaal gebruik, sal ons werk die toets slaag en ons loon kry. Verbrand ons werk egter, sal ons nie beloon word nie - hoewel ons self gered sal word. Maar dit sal wees soos om uit die vuur geruk te word, dus net-net. (v.15).

- In v.13 skryf die apostel dat die gehalte van elkeen se werk "getoets" sal word - dit sal op die proef gestel word (OAV).

Daar is twee woorde in Grieks wat dui op die aanlê van 'n toets.

Die een woord (Gr. *peirazo*) dui op 'n toets wat aangelê word met of sonder verwagting oor die uitkoms daarvan. Dit kan selfs dui op 'n verwagting op 'n negatiewe resultaat.

Maar dis die ander woord wat hier gebruik word (Gr. *dokimazo*). En dikwels dui dit op 'n toets wat optimisties en met verwagting aangelê word - dat die uitkoms positief sal wees.<sup>3</sup>

In Lk 14:19 en Jh 6:6 word die betekenis van die woorde goed uitgebring.

Eersgenoemde vers vertel van 'n man wat nuwe osse wat hy gekoop het wil gaan "probeer". Hier word *dokimazo* gebruik. Die suggestie is dus dat hy met opgewondenheid nie kan wag om te sien hoe goed sy nuwe aanwas gaan vaar nie.

Johannes 6 - die gedeelte oor die vermeerdering van die brood - gebruik daarenteen *peirazo*. Dis 'n toets wat die Here Jesus op Filippus

---

3. George Berry, *A Dictionary of New Testament Synonyms*, Zondervan, 1979, p.37. Vergelyk ook Richard Trench, *Synonyms of the New Testament*, Eerdmans, 1976, p.278-281 en Kenneth Wuest, *Treasures from the Greek New Testament*, Eerdmans, 1973, p.126-131.

aanlê - om sy kleingeloof uit te wys. Daar is 'n skare wat moet kos kry. Dan sê Jesus vir Sy dissipel, "Waar sal ons gaan kos koop?" As Filippus geloof gehad het, sou hy gesê het dat daar vyf broodjies en twee vissies is, en dat die Here dit sekerlik kan vermeerder. Maar Jesus weet hy het nié hierdie geloof nie en wil dit sagkens vir hom aan die verstand bring.

- Die vuurtoets sal dus nie eendag daarop gerig wees om alles wat sleg was in ons lewens uit te wys nie. Intendeel, dit sal juis in die eerste instansie die goeie wil uitwys! (vandaar die gebruik van *dokimazo* in 1Kor 3:13). Dit sal niks wat beloon kan word wil oorlaan nie.

Vir God se kinders, ten spyte van die skrikwekkende gewigtigheid van die geleentheid, sal die eindoordeel inderdaad 'n blye oomblik wees. Nee, meer nog, *dit sal gepaard gaan met onbeskryflike vreugde oor die wonderlike loon wat toegeken word! En ons praat nie net van 'n lourierkrans wat spoedig verwelk nie, ons praat van 'n welgeluksalige lewe, onbeskryflik in sy heerlijkheid, wat tot in alle ewigheid nie sal verbygaan nie.*

### 'n Apostel se gesindheid (1Kor 9:24-27)

Die apostel Paulus het uiteraard die twee Skrifgedeeltes wat ons hierbo bespreek het, goed verstaan. Daarom het hy alle ywer aan die dag gelê om met goud, silwer en edelstene te bou. In sy Christelike wedloop het hy voluit gehardloop. Hieroor skryf hy onder meer in 1Kor 9.

- As hy in v.24 sê dat net één die prys kry, bedoel hy nie dat net een persoon eendag beloon sal word nie. Dis sy manier om te sê, aangesien net een in 'n gewone wedloop die wenprys kry, is alle atlete wat ernstig is, ingestel op die eerste plek. En dieselfde gesindheid van toewyding moet óns geestelike wedlope kenmerk. Ons moet dus "*gaan vir goud!*"

- Vergelyk mens v.27 in die OAV en die NAV, kom jy 'n verskil agter. Die NAV is 'n beter weergawe van Paulus se bedoeling. Hy sê nie dat hy bang is om *verwerp* te word nie. Hy is nie bevrees dat hy verlore sal gaan nie. Daarvoor is hy té gevestig in Christus, té oortuig van die onomkeerbaarheid van regverdiging. Wat hy sê, is dat hy alles in die stryd werp sodat hy nie vir die *prys* gediskwalifiseer sal word nie (vgl. NIV). Hy wil nie loon inboet te wyte aan laksheid nie. Ten alle koste wil hy verhoed dat sy lewenswerk in rook sal opgaan.

- Elkeen van ons het verskillende gawes en roeping. In Paulus se geval moet hy die evangelie op skrif stel en dit ver en wyd verkondig. Om so getrou moontlik in die uitvoering van sy taak te wees, span hy al sy kragte in (1Kor 9:23).

### Ten slotte

- As die Skrif aan die begin van 1Kor 3:13 sê dat elkeen se werk aan die lig sal kom, is dit 'n duidelike suggestie dat die beoordeling baie deeglik sal wees. Alles sal in ag geneem word.

Onthou jy nog wat dit beteken as 2Kor 5:10 sê dat ons voor die Here sal "verskyn". Onthou jy, die woord beteken om *blootgelê te word* - om gestroop te word van elke fassade van ordentlikheid.

Kennelik het Paulus die Here Jesus se waarskuwing baie ernstig opgeneem dat daar niks geheim is wat nie bekend sal word nie (Lk 12:1-3). Hy skryf in 1Kor 4:5 dat die Here die dinge wat in die duisternis verborge is, aan die lig sal bring en die bedoelings van die hart sal blootlê. Na aanleiding daarvan sal elkeen dan lof van God ontvang - meer of minder.

Sien jy, hier kom die positiewe al wéér na vore. Elke keer as ek die voorafgaande woorde lees, wil my keel toetrek. Maar dan verras Paulus ons: voorop in sy gedagtes is nie verleentheid en verlies

wat sal volg op blootlegging nie, maar lof - *lof!*

- Openbaring 19:7-8 sê dat die "regverdige dade van die gelowiges" soos 'n bruidsrok sal wees op daardie dag as die hemelse Bruidegom finaal en volmaak met Sy bruid verenig word. Die vraag wat jou en my dus onontkombaar konfronteer, is dit: *sal ek inderdaad soos 'n koningin geklee wees? Of sal ek maar 'n beskeie en eenvoudige rokkie aan hê?*

- Mens hoor soms dat mense sê hulle sal tevrede wees as hulle dit maar net eendag tot binne-in die poorte kan maak. Dis vals nederigheid. Dis allermins 'n Bybelse en godvrugtige gesindheid. Nee, kyk maar na die apostel. Soos 'n atleet wat met niks minder as goud tevrede is nie, het hy alles ingewerp in sy geloofswedloop (1Kor 3:9vv; 9:15-27, veral v.24vv). En moedig 'n gelykenis soos dié van die muntstukke ons nie aan om onself te rig op soveel as moontlik loon nie? (Mt 25:14-30).

- Let laastens daarop dat Paulus presies geweet het waaroor dit gaan en wat sy lewenstaak is. Hy ken die reëls. Hy weet wat beloon sal word en wat waardeloos is. Sy teiken is vlymskerp voor hom afgeëts (1Kor 9:26). Hy is gefokus; hy mors nie tyd en energie op beuselagtighede nie.

Nou sal talle van julle vir my sê, dis juis my probleem, ek weet nie wat my roeping is nie. Wat is die Here se wil vir my lewe? Wel, dis 'n baie groot seën as mens jou nis in die koninkryk gevind het - hoe vroeër hoe beter. Maar vir talle kom dit eers met meerdere ervaring en ouderdom.

Nou sal jy dalk sê, wat moet ek intussen doen? Moet ek bloot maar wag? Allemins! Mens ontdek as jy beweeg; nie as jy stilstaan nie.

Begin maar net doen wat jou hand vind om te doen. As jy nood sien, spreek dit aan. En as jy 'n begeerte het om iets te doen, en jy weet dit sal reg wees in die oë van die Here, doen dit voluit. Onthou wat sê Fl 2:13: "... dit is God wat in julle werk om te wil sowel as om te werk *na sy welbehae*" (OAV).

Nog meer: as mens die Bybel versigtig lees, sien jy dat die beoordeling op daardie dag veral sekere dinge in ag sal neem. Laat ons hierdie dinge najaag, en ons kan verseker wees dat die registerstoel van Christus 'n wonderlike en triomfantelike prysuitdeling vir ons sal wees.

En les bes: op die dag van beoordeling sal ons gesindhede en motiewe baie dikwels veel swaarder weeg as die spesifieke daade - dit sal dikwels eerder gaan oor die *wáárom*, as oor die *wát*.

### **Nico van der Walt**

- Nico v/d Walt onderskryf die historiese, intemasionale en reformatoriese 1689 Baptistebelydenis, asook die Belydenis van Sola 5, 'n assosiasie van Godgesentreerde evangeliese gelowiges in meer as 'n halfdosyn lande in Afrika suid van die ewenaar.
- Subskripsies, adresveranderings, kansellasies en korrespondensie: Postnet Suite No.148, Privaatsak X1, Northcliff, 2115, Suid-Afrika.  
E: [nico.vanderwalt@reform.ed.org.za](mailto:nico.vanderwalt@reform.ed.org.za) ; Tel. 011 476 2907; 082 848 9396.
- Blogs: [www.e-preke.blogspot.com](http://www.e-preke.blogspot.com) (met skakels na nóg 4 blogs)
- 'n Preek/studiestuk soos hierdie word op 'n gereelde basis wêreldwyd en gratis in Afrikaans en Engels per e-pos gestuur aan mense wat dit persoonlik aangevra het.
- Geen kopiereg. Dupliseer of preek gerus. Of stuur verder.